

各發其願讚歎施人其施食人心得清淨而
便疾證梵天威德常修淨行具足成就供養
百千俱胝恒河沙數如來功德於諸怨敵而
常得勝若比丘比丘尼優婆塞優婆夷若欲
供養一切三寶應當具辦香華飲食誦此陀
羅尼呪呪所施食及香華等二十一遍供養
三寶此善男子善女人等具足成就諸天妙
供及無上供尊重讚歎一切如來刹土三寶
諸佛憶念稱揚讚歎諸天擁護佛言汝去阿
難當自護身并及廣為諸衆生說令諸衆生

成就具足無量功德所生之世常值百千俱
胝諸佛

佛說救面然餓鬼陀羅尼神呪經

佛說甘露經陀羅尼

唐于闐三藏實叉難陀譯

南無素嚕瞞耶一怛他揭多_{去聲}耶二怛姪他
三唵_四素嚕素嚕_五瞞囉素嚕_六瞞囉素嚕
七莎呵八

右取水一掬呪之七遍散於空中其水一滯
變成十斛甘露一切餓鬼並得飲之無有乏
少皆悉飽滿

佛說甘露經陀羅尼

大陀羅尼末法中一字心呪經

念十
出文殊根本儀軌經

唐北印土迦濕密羅國三藏寶思惟譯

如是我聞一時佛在淨居天宮不可思議種種莊嚴一切菩薩衆會中住及諸天龍藥叉健達縛阿素洛等星宿天仙皆是十地菩薩

方便化現在於此會爾時世尊坐蓮華藏界觀察大衆諸天仙等爲欲利益後末世時一切衆生故入於一切如來最上大轉輪王頂三昧即於眉間放一大光其光普遍十方世界一切佛刹其中衆生遇斯光者靡不歡悅其光遍已還至佛所圍繞三匝入如來頂當入之時復現種種莊嚴之相其光之內忽有聲曰我是大轉輪王一字之呪無量天仙恭敬圍繞爾時光中復出聲告白釋迦如來我是一切如來智慧轉輪王一字心呪於一切

過現未來一切諸佛我是最上秘密心咒寶
蓋佛娑羅樹王佛無量光佛無勝佛妙眼佛
妙幢佛華王佛彼等諸佛普皆已說一切過
去無量諸佛亦皆隨喜汝今當為未來眾生
敷演斯咒令諸眾生獲大利益爾時世尊見
聞斯已告諸大眾汝等當知云何名為一字
轉輪王咒即說咒曰

𑖀

此是梵本
一字之咒

部上聲林去聲二合此是
唐音彈台呼之

爾時釋迦牟尼佛復告諸天仙眾汝等諦聽
妙吉祥童子此陀羅尼我今欲說曼陀羅法

及念誦法設大食法速令成就若有人能持
此陀羅尼最勝妙法若不知吉祥之日及諸
星等汝諸天神勿為障礙若有能行我教法
者汝等天眾護持是人一切鬼神及諸毒惡
毘那夜迦等亦當守護不得損害方便護念
於十力教中令生信解說是語已即入三摩
地所謂一切如來頂生三昧除諸有情不善
業故爾時世尊入彼三摩地已十方諸佛觀
察如來在清淨天宮一一皆來集會各請釋
迦牟尼佛說咒而說頌曰

佛說大威德	為利諸有情	能成一切呪
願者皆滿足	一切佛已說	此呪王威德
能於諸呪中	一字為尊上	頂生大威德
其力難思議	善除諸妖邪	退諸惡星宿
毒害母神等	及彼那夜迦	惡願諸鬼神
逼惱有情者	當來濁世中	誦持得安樂
善哉天人師	願為衆生說	
爾時十方諸佛說此頌已默然而住當爾之		
時三千大千世界一切有情所住之處忽然		
之間放大火焰威光赫耀而皆不損一有情		

類爾時釋迦牟尼如來觀察一切清淨天宮
告諸菩薩摩訶薩及諸緣覺聲聞天仙諸大
衆言汝等諦聽即說頌曰
告諸佛子等 汝等今諦聽 我今說此呪
具足諸功德 當來惡世時 我法將欲滅
金十能於此時中 護持我末法 能除世間惡
毒害諸鬼神 及諸天魔人 一切諸呪法
若聞此呪名 皆悉自摧伏 我滅度之後
分布舍利已 當隱諸相好 變身為此呪
佛有二種身 真身及化身 若能供養者

福德無有異 此咒亦如是 一切諸天人
能生希有心 受持及供養 所得諸功德
如我身無異 此咒王功德 我今但畧說
爾時世尊說此頌已爲諸衆會說斯輪王如
來頂髻之法能令他法速即毀壞能令自法
速得成就一切菩薩所共讚歎誦念之處於
四方面五百驛內一切惡鬼皆自馳散一切
呪師行其本法聞此咒已皆悉摧壞一切諸
天所有神通皆悉退失其持呪者欲滅他法
不滅他法由持呪者所存念處一切世間及

出世間諸持呪者及諸惡星無不摧伏若善
男子爲護大乘若爲自身若對怨敵應以手
執一把青草呪一百八遍意念彼人以刀斬
草念壞彼法即便斷壞若欲令彼前人呪法
不成就者誦呪七遍以手作拳意屬彼人即
不成就若欲令彼前人成者即開其拳還得
如故若欲作此法者先須洗浴著鮮淨衣自
法即得成就
若欲護持他人一切惡鬼皆不敢近此呪所
自護身所護他人所呼鬼神所遣鬼神所求

事業並用此呪

若持諸呪無有神驗爲誦此呪一百萬遍即得成就所得境界若無効驗其神當即消滅若欲天神來爲給使當取油麻酥蜜酪等和之少取一撮一呪一遍一投火中燒之滿一百八遍一日三時至七日內其神即來便爲使者若欲降伏諸天取天木一百八片一一誦呪投其火中

若欲降其神者念其名字一日三時作法至七日內速來降伏

若欲降伏諸龍女者取酥蜜乳一日三時誦一百八遍於火中燒至七日內即得成就若降藥叉及藥叉女一依前法取酪飯燒之即得成就

若欲降伏健達縛及其女者燒一切香一依前法燒種種華一切八部女神即來降伏若欲降伏真婆羅門取好名華及白芥子一依前法即得如意

若欲降伏筏舍之人取酪乳酥一依前法即得成就

若欲降伏成達羅取酥土和一依前法

若欲降伏一切惡人及惡星宿者取酥及油
麻燒之一依前法如上說者須七日內三時
洗浴誦呪一百八遍即得成就

爾時世尊說斯語已呼文殊師利呪法中有

如上威力於後末世此法能令一切衆生受

持行用更有種種諸法我今略說此語已

爾時世尊默然而住于時四部大衆白言世

尊唯願慈悲更說餘法未來衆生得安樂故

爾時釋迦牟尼佛復更觀察清淨王宮告妙

吉祥童子曰善聽我今略說一字轉輪王威
驗呪及畫像之法爲今惡世有情少於精進
少於明慧不能受持廣畫像法者我今略說
畫像之法爲欲利益有情故速得吉祥義故
若欲受持最勝法者取新白氎長一丈闊六
尺未斷縷者勿以膠爲彩色其畫像師香湯
洗浴著新淨衣受持八戒當畫世尊作轉輪
王像說法之容一切世界主座下畫梵王聖
金剛菩薩佛上畫兩華鬘王子座下畫持法
人爾時世尊釋迦牟尼復觀妙吉祥童子告

言諦聽妙吉祥童子一字轉輪王大威驗略
說畫像法我今說之令惡時衆生得安樂故
若欲作法者手持香爐諦觀佛面以其像面
向西方於前種種香華供養持法之人每日
三時燒沉水香面向佛像誦此神呪念十一百萬
遍然後作法持法之人應須持戒九每須喫三
白食所謂乳酪粳米不得破齋於一切衆生
發慈念心持菩薩戒此人凡所欲作功驗之
事及療一切病皆得如意常須供養一切三
寶若欲成就輪法者以鐵作輪其輪二轂於

佛像前立一方壇從月一日至十五日三時
洗浴燒沉水香誦呪至百萬遍常用諸華以
爲供養十五日已更作一壇中安其輪兩手
蓋上至心誦呪輪現火光當持法人能昇虛
空於明呪中爲其仙主若餘人見亦得騰空
若欲成就傘蓋法者作新白傘蓋種種金銀
寶物莊嚴內中懸一口幡手把其傘一依前
法誦呪當即火出其持法人即騰虛空皆如
上說
若欲作法取白月十五日及五節日所謂月

八日十四日十五日二十三日及月盡日身
得變化十五日內必得成就若此成就者一
切諸法亦得成就得一切神通及一切佛菩
薩法此世界中作轉輪王千子圍繞

若欲作佛頂法者用金或銀或鈐或鑠如一

手掌大如佛頂依如上法誦咒頂上火光即
得騰虛與一切衆生說法壽命一大劫

若欲成就如意瓶法當作一金瓶一切穀子
一切藥子及諸寶物滿其瓶中其瓶上蓋白
淨氎布臘月一日起首誦咒至一周年即得

成就於其瓶中所須之物常取不盡

若其欲得如意寶者若金若寶若水精一依
前法以布蓋上誦咒一年速得成就所求皆
得若在天中若在人間手持此寶即作轉輪
王於彼像前誦咒萬萬遍即騰虛空壽命一

念十

十

大劫

若欲成就金剛杵法者以紫檀爲金剛杵一
枚若無紫檀鐵鏈亦得以五牛物洗之五牛
物者所謂乳酥酪糞尿常以臘月十五日於
其像前清淨廣設供養然一百盞牛酥爲燈

又以香湯洗金剛杵其持法人以身布施一切諸佛菩薩於後用轉輪王咒以護其身至十五日夜二更中以其右手執金剛杵當於像前一心誦咒遂金剛杵現其火焰一切天仙諸龍鬼等與其部衆咸至其所將持咒人入明仙處冊立爲王其人身力同如金剛菩薩若意欲往所在之處隨意無礙壽一大劫能見彌勒菩薩說正法處若樂求生處自在如意即得往生

若欲成就雄黃之法取好者一兩鬼星見夜

三日斷食又設衆僧食於其衆前合掌從乞進止若衆僧許供養世尊於一切衆生發慈悲心於其佛前然一千盞牛酥明燈持咒之人自身施佛作法竟已乞願當取其雄黃誦咒若熱若烟若火光出現三相已取少雄黃點著眉間一切天龍鬼神及人非人即來奉事其持咒人壽命千年若點額上即不現身天神亦不能見若欲須現亦得隨意壽命三千年若現火出即成明仙所有同伴並騰虛空勝諸仙人壽命一劫若捨此身生觀史天

念十

十一

若欲成就執戟法者當用好鐵爲戟一周年
間執戟誦呪取沙作一塔於前著食施與衆
生於其塔前左手執戟跏趺誦呪即出種種
光明持呪之人即騰虛空大自在天衆迎持
法人種種好華散身圍繞餘所見人皆共騰
空彼持法人能爲大王常以大自在王諸天
仙人皆來恭敬壽命一大劫若有惡心來相
向者當即墜落諸天龍鬼尚不能惡何況凡
夫若捨此身得生西方極樂世界
若欲成就死人法者取無瘡癰未損壞者將

於壇中卧其地上令面向上作四箇佉陀囉
用一色木爲楸繫其脚手持呪之人坐於心
上擣寶物爲末少少取一一誦呪內於死人
口中至於死人開口舌上吐出如意寶珠取
得其實即於明仙間爲轉輪王隨心所願器
仗即自現來其身出現光明照得四方一百
餘驛壽命自在意若須他世界作王即能如
意捨命能生無垢世界
若欲成就第二死人法者一依上說取棗木
爲楸即以鐵末一一誦呪少少內於死人口

中至其出舌即割其舌共同伴亦騰虛空所願即得壽命一小劫若於此捨命得生一瞻部洲爲王

若欲成就鉤法者取茅草作一鉤如一手大五牛物中洗之一日一夜斷食而取其鉤手

念十

十二

執供養金剛菩薩然百盞酥燈先誦大佛頂悉達多鉢多囉呪以護其身後誦此呪能令成就如前輪法若結一日光明所照之處積一土壇即用棗木作四箇楸呪之七遍一一角中釘著便當結得十方界於第二更中結

跏趺坐一心供養彼鉤頂禮一切佛及菩薩當取彼鉤手執誦呪所有地獄受苦衆生即能無苦持呪之人當即聞聲飛騰虛空手把此鉤與一切明衆生王一切天龍見持呪人即當禮拜供養壽命一大劫於彼捨命即生於金剛地見金剛境界若欲成就像者而畫一像當火出即騰虛空得作明仙若欲成就別法先誦此呪十萬遍一日一夜必須斷食設大供養取邊迦木作火烏麻牛酪酥蜜呪一千八遍少少投其火中即得成

就心所願者皆得圓滿

若欲降伏大自在天先須供養於大自在天
坐南邊作火燒烏麻等四物誦呪滿足一千
八遍自身先須潔淨防護誦呪七遍以水灑
身當時即有聲出不須恐懼大自在天當即

現身願者皆得

念十

十三

若欲那羅延及梵天王等成就者當作此法
即得成就先須護自身

若須喚藥叉母及姊妹妻取無憂華誦念彼
名一日三時而呪其華至一百八遍火內燒

之於七日內即能得至願者皆得若母及姊
妹妻若七日內不來彼藥叉頭破當降伏若
喚諸龍者當取龍華燒如上法

若欲呼喚藥叉者三月內取酪飯日三時各
呪一百八遍至月盡日一日一夜當須斷食

供養佛像諸藥叉等須與飲食用代吒木爲

柴

此云多根本三
藏云廣州出

酪酥蜜飯於內燒之意念

呼喚藥叉來者其酥酪蜜飯誦呪一千八遍
一呪一燒其食當得毗沙門諸藥叉衆等速
來彼處取過迦木華於前迎之諸藥叉曰當

須我等作何事耶彼即告言每日須一藥叉守我門戶所遣作事即當作之所須物者當能成之若須乘騎即得騎之若須長年藥者當即與之

若欲降伏金剛神者先須誦四千三十二遍十二月一日至正月十五日須供養佛并設三七僧齋當須發願以此供養功德迴施金剛當夜二更時起結跏趺坐於其火中燒安悉香誦呪其香丸如梧桐子大誦時意念見金剛神呪至三更即當雷鳴地動天雨種種

妙華金剛即來及一切天龍八部菩薩等來共圍繞其持呪人取香湯水并華出迎恭敬禮拜金剛當即告曰汝求何願隨乞皆得壽命一劫若捨此身即生金剛住處

若欲成就餘明仙者亦須作此金剛之法即

當成之

金

十

若須成就佛呪法者及觀世音呪法梵天呪法大自在天呪法及世出世須作此法若持餘呪不成就者即須此呪共餘呪七日內誦之即得成就若其不成及不現驗其呪

神等即當滅亡

若於大自在天及諸天等前七日誦呪若不現身即令頭破

若日月蝕日所須和合湯丸藥等先須預備其日誦呪至日月明淨其藥等法速即成就若有婦人求男女者先誦其呪一百萬遍燒沉水香供養須十二月一日起首至於十五日於道場中供養并設三七僧齋其婦人一日三時燒香誦呪心念發願請求男女其十五日夜二更時取烏油麻以酥和之誦呪一

遍一迴燒之滿一百遍其夜四更當見境界或菩薩形狀等即自知之若彼婦人心中所念便獲其願燒香常於像前持念此呪即得成就

若求隱形取雄黃藥一小兩中之半兩也取

念十

人乳和合以爲五丸取沉水香作合子盛之

十五

取一九誦一千八遍及白芥子亦以五顆誦一千八遍一一並於合內盛之須至日月蝕日誦呪其合子內若其有聲一切衆生見此呪人悉皆歡喜所須皆得若其出烟其持呪

人即不現身所至諸處皆爲其主壽命一小劫若出火焰其持咒人身即端正猶如天童似年十六與諸天神爲主壽命一大劫百寶藏門悉皆自現

若欲成就牛黃之法一依雄黃法作若欲成就眼藥法者取石安善那及青蓮華青木香各重一錢其藥於熟銅鈔鐸中安之至日月蝕時日夜誦咒烟出即以此藥內其眼中其持咒人即得隱形與隱形人爲其主人也若欲成就刀法取無癡刀於二十三日或二

十九日供養其像散衆生食護淨自身右手執刀誦咒至刀聲出當即騰空所願隨意又若火出所同伴人得見火者並悉騰空與一切騰空人爲主

若欲成金剛杵取好鋌鐵長十六指打作三稜上下各作三頭摩以紫檀用塗其上從十二月一日供養其像始從一日設四僧齋日漸加一僧自須持咒至十三日供養僧了即不喫食至十五日夜於舍利塔前供養圖像然以酥燈一百八盞自坐茅草受持此咒兩

手執杵誦呪之其杵即便火出其持呪人
即得昇仙其同伴等亦騰空作明仙主神力
猶如金剛壽命一大劫命終已後生金剛菩
薩處更若欲求成就就刀器仗等物一依前
法即得成就

若欲除家內諸惡者作地火爐^{十六}四邊畫作蓮
華火爐內取桑木作柴并酪及酥蜜一日三
時誦呪一千八遍至三日內即得成就
若欲護一城一村於七日內燒賒彌迦木及
酥酪蜜燒之即得成就

若欲祈雨取烏圖末羅木^{此云其木似槐子}燒木爲
火并酥酪蜜燒之於七日內即得成就
若護一國所求如前所說取桑木燒之
若欲求長命者於十二月一日至十五日乞
淨潔食誦呪總滿三十萬遍至月盡日二日
已前不喫食取黑牛乳一升誦呪滿得一百
八遍須以香華供養於佛其乳自服即得長
命若十日內其酥酪蜜燒之及結縷草即得
長命

若求降伏逆賊取獨頭及娑邏迴呪一千八

遍令賊見聞婆邏迴聲及見獨頭即便自縛
若取一切草子少少盛滿一新瓶瓮和水誦
之一百八遍取其苗子及水浴身除一切諸
惡不能為害

若有人食諸毒藥者取孔雀尾誦呪十萬遍

禁毒及諸惡病皆得除差

若一切天行熱病結索呪一百八遍繫其人
項一切熱病當得除愈

若佉羅木

此云
檀木

作火酪酥蜜相和燒於火中

呪一百八遍一遍一燒少少燒之即得伏藏

若以紫檀刻為蓮華滿十萬箇於大江河入
至腰際一一呪之放其水中依檀華數即得
金藏若以毗梨婆木此云其木
似檀為火并依前
二味一一呪之滿至一千八遍即得依前無
盡金藏沉香并依前三味燒之二十一日
內日日三時一時誦一千八遍一切諸天龍
神皆來為使者
若以秬米及酥酪蜜與火投之誦呪滿一千
八遍即得無盡百味食飲
若安悉香丸如梧桐子與三味和一一誦呪

燒之滿足一千八遍一切藥叉來爲使者

若阿輸迦華

此云無憂華

及以三昧誦呪一千八

遍一一燒之一切藥叉女來爲使者

若燒龍華及以三昧一切諸龍來爲使者

若燒沉香及三昧等依前誦呪一切金剛來

爲使者

若燒末怛那果及以三昧依前作法一切明

仙皆來爲使

若沉香木爲火燒蘇合香呪一百八遍一切

健達縛來爲使者

若燒熏陸香一切餓鬼來爲使者

若尸利縛色得伽藥和沉水香燒之一切緊

捺落來爲使者

若燒白膠香一切毘那夜迦來爲使者誦一

百八遍若燒白芥子及白芥子油一千八遍

誦呪了已國王歡喜若一日三時至七日內

作法即成就

若對日前誦呪十萬遍一切惡障皆悉消滅

若誦一遍護得已身若誦二遍朋友財物皆

蒙擁護

若欲得蓮華法成就者以紫檀木爲一蓮華
二日勿食左手執華於像前坐誦至其火出
當爾之時及諸同伴飛騰虛空於明仙衆爲
轉輪王於彼捨命得生西方極樂國土

若取摩羅末伽土

此云鼠土

以沙共和作金剛

杵長十二指手自執持家家乞食必定不得
共於人語誦呪十萬遍其杵上頭作孔著白
芥子至日月蝕日像前誦呪令其杵中芥子
作聲所求願者皆得成就若以杵擊山山自
摧碎凡所施爲咸得遂意若將其杵入海海

水隨意若執此杵誦持呪法一切毘那夜迦
不得障礙若入河海深水中者其水至腰取
十萬蓮華一呪一擲水水中當即妙吉祥天
女出現所願皆得

若取蓮華三十萬莖誦呪依前水中放之求

廣大願皆得稱意

念十

十九

若取蓮華五十萬莖誦呪依前水內放之最
極廣願無有不隨

若月一日取闍提華香

似支子華香

誦呪一百八

遍一一散擲呪像足前一日三時至十五日

作此法者其像足上現出火光入持呪身當
即不現共諸伴等即騰虛空於明仙衆得作
轉輪王壽命一劫

若坐海岸以龍木柴爲火面向西方執龍華
木誦呪十萬遍燒於火中當即海水激爲波
濤騰浪涌溢當爾之時幸勿憂怖但以至誠
專心誦呪水中即現眞婆羅門所求皆得所
遣皆作

若於地上畫千葉蓮華而坐其上誦呪十萬
遍其地即裂有神出現與持呪人共同伴等

即騰虛空於明仙衆爲其仙主壽命一劫若
十二月一日至十五日取闍提華一一誦呪
散佛頂上滿十萬遍頂即出光照人身上得
五神通若其華呪滿百萬遍所願皆得

若取地上曲蟪之土作一師子牛黃塗之坐
安壇中恭敬供養誦呪至於師子自動即得
成就所求皆得

若乘騎師子所願生處速得到彼命同梵天
若作象及水牛一依前法若也出聲諸至皆
成索者皆得所遣皆作

此轉輪王呪所須事者皆得成就所須物者
一依心願以淨信意作此法者無不成就
爾時世尊說斯法已復作是言我若廣說此
呪威力成就諸法窮劫無盡汝等當知要略
而說爾時會中有無量無邊不可思議菩薩
摩訶薩天龍八部轉輪王等心大歡喜咸唱
善哉釋迦如來能說此事難可思議然我等
輩誓當護持此呪若見有人及以非人受持
讀誦書寫供養愛念思求者當與擁衛令無
災患若於國中見有此呪等恭敬彼國諸人

如佛無異各以神力防禦國境令惡鬼神兇
賊猛將風雨水火使不得侵損百姓熾盛國
土安寧財穀豐熟無諸饑饉疫病不祥亦令
退散爾時如來讚言善哉善哉汝等實能如
是擁衛佛說經已諸菩薩衆天龍八部皆大
歡喜信受奉行

大陀羅尼末法中一字心呪經